

Maenzdoengzlingz Ringx Bae Ringx Dauq Haenx

滚来滚去的小土豆

Doenghbaez, miz aen maenzdoengzlingz luenz-lulu ndeu, de deng ndaem youq ndaw namh.

Maenzdoengzlingz gag siengj: Gou daengx ngoenz youq ndaw namh laepaurau youq, aen seiqgyaiq baihrog dwg maz yiengh ha? Gou itdingh okbae yawjyawj dwg yiengh lawz cij ndaej! Yienghneix, de byoengq ok caengz namh nanwt gwnz gyaeuj, daeujdaengz seiqgyaiq baihrog, hainduj byaij diuz loh bienqvaq geizheih ndeu.

Maenzdoengzlingz ringx ha ringx ha. Ringx dwk ringx dwk, deng boux canghdwknyaen ndeu gip dawz lo. Canghdwknyaen siengj: Aen maenzdoengzlingz neix baenzneix luenz, dawz ma ranz caeuq lauxbaengding aeuq gwn ba. Canghdwknyaen ma daengz ranz, swnhfwngz dawz maenzdoengzlingz cuengq gwnz daiz. Swnh mwh canghdwknyaen bae ranzdajcawj ra lauxbaengding, maenzdoengzlingz yat hwnj gwnz daizcueng, daj gwnz cueng hai doucueng haenx diuq roengz gwnz diegnywj baihrog bae.

Maenzdoengzlingz laebdaeb ringx ha ringx ha. Ringx dwk ringx dwk, deng duz ma ndeu gip ndaej lo. Lwgma siengj: Yienznaeuz gou mbouj rox neix dwg gijmaz, hoeng dawz de daeuj dangq aen giuz

guhcaemz itdingh gig mizyinx. Yienghneix, lwgma dawz maenzdoengzlingz dingj hwnj byonghmbwn bae, youq mwh de yaek doek roengzdaej caiq dingj hwnjbae. Maenzdoengzlingz ginglig baez youh baez mbin hwnj doek roengz yaek dai bae lo, naj cungj beg liux. De ciedmuengh hemq naeuz: "Vaiq cuengq gou roengzdaej, gou lau lai lo!" Duz ma guhcaemz miz di yeq lo, fan mbat ndang ndeu, aeu aen dungx ciep dawz maenzdoengzlingz, caeuq de doxbiek lo.

Maenzdoengzlingz laebdaeb ringx ha ringx ha. Ringx dwk ringx dwk, youh deng boux nungzminz guh nazreih ndeu gip ndaej lo. Nungzminz siengj, maenzdoengzlingz baenzneix fag, wnggai dwg ceh ndei, gij maenzdoengzlingz aeu de ndaem okdaej haenx haengjdingh youh hung youh luenz, itdingh gai ndaej gyaqcienz. Yienghneix, nungzminz dawz maenzdoengzlingz ndaem youq suenbyaek ranz de.

Maenzdoengzlingz siengj: Saedceij ringx bae ringx dauq youh miz maz yi yi ne? Moix aen sengmingh cungj miz gizdieg haeuj bonjfaenh. Namh ndaem cij dwg gizdieg sengmingh mbouj dingz mbouj duenh gou. Mwh seizcou daeujdaengz vihliux hawj vunzlai sou ndaej engqlai maenzdoengzlingz,



youq ndaw namh vih vunzlai guh di gung'yen ba!

(Sanhdungh Swngj Cinghdauj Si Dungzanh
Lu Siujyoz seiq nienzgaep Vangz Nenyuz)



Nae Youq Gizlawz

雪在哪里

Doenghbaez miz naed nae ndeu, de dwg dah niq nqswnh ndeu.

Miz ngoenz ndeu, nae mbin daengz ndaw doenghnaz.

"Gou yaek hawj namh ndaw doenghnaz hoemq denz." Yienghneix, nae hausag lumj dahsien nei, daj gwnzmbwn mbin roengzdaej, hoemq daengx doenghnaz.

Nae youh mbin daengz gwnz bya sang bae.

"Gou yaek bang bya sang longz buhrog nanwt." De dawz baenz duj baenz duj nae saj roengz bya sang bae. Nae doek gig hung, mbouj yaep ndeu, couh hawj bya sang longz hwnj buhfaiq hausagsag.

Nae daeujdaengz suenva.

"Gou yaek bang vamoiz daenj geu vunj gyaundeih." Nae daj gwnzmbwn mbin roengzdaej, lumj baenz duz baenz

duz cinglingz rox diuqfoux nei, gig vaiq couh bang vamoiz daenj hwnj vunj sahau.

Daengx aen daihdeih cungj deng nae hoemq lo, benq hausagsag ndeu. Nae nyaengq sat le, dingz youq dinggranz yietnaiq, de naeuz: "Seizneix, lij miz byawz yungh gou bang de hoemq denz ne?" Yawjdaej, caiq hix mbouj miz byawz lo.

Seizde, raq rumz iq raeuj-rub ndeu coemj gvaqdaej, nae ndawsim yaeng' yaeng naeuz: "Yawjdaej, gou wnggai biek aen singz neix bae lo." Gyoengq lwnyez dingqnyi sing rumz iq ci, daj ndaw ranz cungj buet okdaej lo.

Gyoengqde ngeizngwd naeuz: "Yi, nae ne? Siusaet lo, mbouj rox bae gizlawz lo."

(ngeih nienzgaep Liuz Yozhanz)

Goj Gou Caeuq Godoengj

我和橘树的故事

Moix boux vunz cungj miz seiziq swhgeij, cungj miz saeh mizyinx seiziq hawj vunz nanzlumz.

Geiq ndaej miz baez ndeu, gou siengj rox swhgeij maj mbouj maj sang, couh siengj daengz aen banhfap "ndei" ndeu: Ra go faex ndeu, caiq aeu gonj bitgeiqhauh ndeu, moix bi aeu bit veh ndang sang swhgeij youq gwnz faex, yienghneix couh ndaej doxbiej bouhfaenh maj sang haenx. Gou aeu go faex veh ndang sang haenx dingh youq go faexmakdoengj ndeu, gou ndwn youq gwnzdieg, sijsaeq rau ndang sang swhgeij, yienzhaeuh siuj-sim aeu bit youq gwnz faex guh ndei geiqhauh.

Gou ndawsim cungj maqmuengh yawj ndaej raen bonjfaenh baenz di baenz di maj sang, hoeng doeklaeng sawj gou gig saetmuengh. Couh

yienghneix gvaq le song bi, gou raen gou mboujdanh mbouj maj sang, lij beij gaxgonq veh gij geiqhauh haenx lij daemq haujai, yawjraen gijneix gou hainduj mboujonj lo, aen sim lumj duz douq nei luenh diuq, nyaenx mbouj ndaej siengj: Gou gvaqlaeng dwg mbouj dwg yied maj yied daemq, yied maj yied iq, doeklaeng lienx daxmeh hix yawj mbouj raen gou ne? Dwg mbouj dwg deng duz meuz duz ma gwn ne? Dwg mbouj dwg deng bouxwnq caij roengz ndaw namh bae benz mbouj hwnjdaej ne? Gou siengj daengz gijneix couh lau yaek dai, ganjgip buet ma ranz ra daxmeh, lwgda aeng raemxda cam naeuz: "Meh, vihmaz gou yied maj yied daemq ha?" Daxmeh dingq le bae naj godoengj yawjyawj le, heux gofaex gien youh gien, sawqmwh, de riuhaha hwnjdaej, riu ndaej raemxda cungj rih okdaej lo, gvaq yaep ndeu cij dingz roengzdaej, de naeuz: "Mwngz caen dwggayez ha, mwngz mbouj maj daemq law, mwngz dwg menhmenh maj sang, gofaex hix maj sang ha, maj ndaej beij mwngz lij vaiq di." Sou yawj, gienh saeh neix dwg mbouj dwg gig mizyinx ne?

Seiziq moix boux vunz cungj miz di goj mizyinx ndeu, lumj: Dawz bwnda daeq bae ha, bang vunznae swiq ndang ha..... Seizneix, ndwenngoenz seiziq gaenq menhmenh bae gyae lo, hoeng doenghgi saeh mizyinx seiziq gou itdingh baenz yiengh baenz yiengh geiq youq ndawsim.

(Gyanghsuh Suhcouh Swhsanh Sizyen Yozyau Cau Siengghanz)

